

宜陽縣志續編

祥異

咸豐十一年夏彗星長竟天自西北噴至東南光芒徹夜歷
秋始滅

同治元年夏六月飛蝗蔽天自東而西徧滿隴畝

光緒七年有星晝見

八年十月望後星隕如雨

十九年五月某日午後韓城西遭大風大水斯拔三鄉廟費
瓦皆飛越數十丈范氏所建之坊亦被吹倒

二十六年正月初二日晨刻洛北一帶居民忽相驚以走時

值令節

俗謂之
拜年

往來省親者或至拋棄其穉孩於道若逃急

兵然不知何自起亦不知將焉避踰時始定是年三月十六
日晚天雨雹其大如拳厚五寸餘田苗皆盡東西約三十餘
里西北東南約百餘里三鄉爲甚

二十七年二月恆陰霾黑風四起白晝昏不見人是年夏大
旱秋九月大雪

三十年有星晝見夏大旱中伏始雨秋禾不登

三十三年夏大旱熒惑入南斗出而復入月餘始息

宣統元年七月城東一帶徧地突生黑蟲長寸餘抱禾穗而
食粒子俱盡延至城西亦是年十一月 日晚大雨如注

二年四月上旬五更時彗星出東方長丈餘中旬薄暮又出自西南長兩丈餘

中華民國

元年九月二十一日

以陰曆言暮突黑氛一縷自白楊鎮西

南來俄焉散布天半嗅之有煤烟氣咸相詫異是年秋大旱禾不登場麥未布種

二年春瘟疫大作麥米市價制錢二千七八百文

三年六月

以陰曆言


飛蝗至七月復生蛹城東北鄉暨西關丁灣

靈山橋頭一帶食田禾殆盡其有蝗蛹所未至之處禾穗中徧生黑蟲穀粒皆枯是人所未經見者

三年九月間生員彭生新於汪汴谿洞中獲土靈芝一莖按
彭生多聞識精醫理嘗考察草木藥品於宜境所生之藥
有古今常用而未知宜出最善者有本草已載而後世誤
傳錯認用非其真者有本草有名未用或用不詳確而闕
疑待質者彭生於各門內考察確實在宜境所常見者八
十餘種輯有藥物新識一卷既得土靈芝乃自爲之序
序曰土靈芝形如蘑菇又與未開玉簪花相似所可異者
莖自下起二寸許復折而下頭抵於根其色黃明可愛生
於洞中巖土壁上予取持歸對本草綱目李時珍曰靈芝
之芝本作之篆文象其屈而不伸之義後人借爲語辭遂

加草頭以別之爾雅茵芝也註云是瑞草又或謂生剛處
曰茵生柔處曰芝此則生洞內黃善土壁之上是芝而非
茵可知王充論衡云芝生於土土氣和故芝草生瑞禽禮
云王者慈愛則芝草生今吾獲此非宜邑之禎祥而何

四年春二月上王村郭姓家雄雞孵二卵較常卵倍大鄰村
傳觀遐邇幾徧



疆域

山川

臥雲山在宋店南俗呼南臺坡半壁山之支麓也山多翠柏古色葱蘢中有洞窟西佛藥王諸神祠西偏一石窟深黑莫窺其底

柏山在韓城北旁有橫流澗在水經曰西度水水發源自熊耳山勢蜿蜒西來夾水而東蟠結於秦山北麓是爲柏山在澗之南峯巒聳翠鬱乎蒼蒼邑西一勝景也

湧水在韓城西十九里源出下馬溝西北東南流約五里許過湧佛寺至流渠村南注於洛

銀河源出董王村龍泉北溝溝水自石穴翻花湧百步外與
谷壩東溝水會灌田十餘頃流經宋店至嵩縣馬迴北入伊
高山形若臥虹卽鶴山俗稱活山山上有練船石中透巨孔爲
受練處俗傳神禹治水時遺蹟

瑞泉在鹽坡頭南有白龍寺佛座下有泉潛伏地中俯聽之
水聲如鐘湧出於西南五十餘步人以爲瑞泉云

兵警

紀事也志同史例史諱國惡有兵事則特書之志警也攷河南府志見宜陽民亢珽倡亂一節而舊志缺弗載豈諱言之乎茲特以類叙補述于此

亢珽亢珩邑之張深村人素習拳技以拒捕斃縣役於福昌閣下乃糾黨衆據神后砦自固

即仁厚寨

復結連澗池匪徒李一

寧等百餘人相聚入夥勢益猖獗鄰邑騷動官軍至乃四散走肆焚掠官軍追及於新安之曹村紙房一帶生獲一寧等及首惡亢珽誅之而釋其脅從者亂遂定事在康熙五十年嘉慶元年川楚教匪齊寡婦由嵩犯宜西南境

咸豐 年秋粵匪逆黨數百人突擾宜陽西鄙古村宋塢一

帶已令李公偁督勇勦之追至楊坎賊禦戰勇目莊克己

韓城

人燃礮擊之殪逆酋紅衣者墜馬賊遂大潰邑得無患

同治元年捻匪西竄三月十八日突至段村一帶鄉民團勇
與戰而潰賊蜂屯瞰縣城城中惴懼紳耆謀遣壯役宋城納
金詣賊營求免縣令謝公仁溥知兵事以爲不可 令設守
備嚴防堵急則毋塞南門留生路衆弗聽役往而賊畢登城
遂陷紳民男女赴死者巷井悉滿謝公衣冠坐堂皇罵賊極
口賊燬焉官軍至城復邑人乃拾謝公遺骸於灰燼中葬諸
香山寺側于後縣令周公雲爲之誌詳見藝文

張萬超者東趙保無賴予也兇很好鬥結納亡命相與侵凌
鄉氓遂有肆行劫掠者宜陽刀匪之名乃自此接迹矣

同治庚午歲旱飢匪徒擁萬超於石墨山頂衆至數百人蔓延至岳頂山麓據雲蓋寺爲巢穴勢張甚孫店守備某公督隊往勦敗於山徑被戕於是河北鎮暨東鎮官兵雲集山下邑令恆敍庭先生單騎詣匪巢諭令効順萬超知感泣而匪徒脅之弗得解卒以窮蹙就俘乃戮匪徒百餘人於張塢萬超於洛陽西市伏誅

民國二年秋七月鎮嵩軍標統憨王琨督隊來宜張治功駐白楊鎮武衍周分駐韓城三鄉一帶爲勦匪故也當是時土匪之患亟矣宜陽四境焚掠幾徧申心寬

洛陽人

丁長江郭廣

山

嵩縣人

爲之渠魁范懷金亢城裴贊等


皆宜陽人

亦互相招致居

民震駭維日岌岌經鎮嵩軍搜勦四出丁匪首先就戮復擊斃悍匪魯君保等多名匪黨乃稍稍遠颺潛伏而申匪擾龍門迤南猖獗甚官軍移隊往勦郭廣山等煽動於宜陽之西鄙勢且復熾矣於是縣令張筱波先生躬督練勇招集鄉團從官軍之留駐韓城者四面會勦而居民創鉅痛深亦一鼓作氣合逐匪而圍之於崔家坡杜家渠等村匪突而竄入於馮嶺之東溝中乃聚而殲旃時三年五月晦日也郭范諸匪旣斃官軍之在龍門者復殪申心寬等地方於是乎始獲安謐鄉村頌德歌功到處勒碑紀績焉

土匪之爲患久矣其敢行劫掠在同治初年已然然猶潛藏竊發捕者至鼠竄以去久之而人莫敢捕官不能制則有河北鎮軍分駐韓城白楊樹等處卽在光緒季年

亦恒有巡防軍官爲之時行勦除而匪徒之伺隙乘間恣意焚燬者如故也迨至宣統庚辛間匪勢乃大熾矣始而盤踞山林繼而攻擊砦堡且寢寢焉直與官軍對敵脅人供饌遲則先焚其巢據人勒贖否則立殘其軀半夜呼嘯至則雞犬皆驚一夫荷鎗來則村舍全避於是乎蘇羊就燬矣水碓告陷矣鹽坡頭石陵街亦均被蹂躪矣東向如楊店周村一帶既擾攘以不堪南去則趙保宋店之關復煽誘於不已四鄉震聳奔避無地縣城孤危日益岌岌道絕行人門且晝閉擊柝者忍飢渴以招呼守陴者耐寒凍而蹲踞勞頓踣莫敢遑息噫甚矣憊今幸盜賊屏息地方漸就靖謐夫固謂時局方危之未敢卽安也且又謂後事卽安尤當思危也因述其事之勒諸碑銘者以誌詞曰屹屹縣城燦列錦屏胡然而驚呼四起雞犬爲之不寧匪兇匪虎寇生斯土羣焉嘯聚山林時竄而時伏突如其來劫爾貲財無戕爾眷屬無焚爾廬舍亦云幸哉斷無敢啼之稚孩誰不恤其家誰不憐其子胡縱淫掠以至於此彼實凶悍警不畏死固宜整我戎行盡殺乃止嗚呼噓昔之時人心不固倚山爲城傍城爲塹而猶若皇皇然賊已飛渡今乃淨掃塵氛恍披雲霧作息晏然耕鑿如故噫嘻我公來何暮



墓道

賢大夫祠 祀邑賢侯李公廷揚恆公紱庭兩先生光緒二十二年邑庠生張務學糾合四鄉首事紳庶輸金所建者先是我宜陽有協濟新安兵差之役邑民苦之經李恆兩公再次瀝稟府憲既停免矣詎至光緒二十一年冬分巡道朱公威脅縣主董公迫令復行協濟實新人慫恿之矣閭邑震憤風潮且起韓城張務學膽略素裕勇敢有爲乃挺身倡首主議令陳萬成任上選梁鳳郊李泮藻等瀝稟撫轅各里士民醵金錢爲之資斧幸劉撫軍洞鑒民艱批令各支各差永不協濟鐵案如山矣邑人痛定思痛念非李恆兩公力稟有案何

遽能此乃取訟費餘金鳩工庀材創建祠宇三楹垣牆一周
邑紳陝州學正馬毓麟爲之序以紀其事

高等學堂 在錦屏書院舊址西鄰乃縣尹王鐫於光緒三十
一年所奉檄勸建者邑紳胡鼎三字捷臣素慷慨好義舉爲
之營造講堂三間禮堂三間東西廡房各九間門樓一間耳
房兩間躬親督工獨輸已貲不支官款分毫上憲獎以同知
銜縣尹暨學界人士共送匾額以旌其事

勸學所 在賢大夫祠前亦縣尹王鐫奉檄勸建與高等學堂
並修者講堂三間東西廡房各三間門樓一間耳房兩間共
支銀約五百兩官款出其二仍胡紳鼎三督工獨任其三既